

SAMOA

Faatulagaina o Aiaiga

**VAEGA I
FAATOMUAGA**

1. Igoa puupuu ma le amataga
2. Faamatalaina o uiga o upu

**VAEGA II
O LE PULEGA**

3. Faaauauina o le Pulega o Faailoga ma Tusi Pasi Taualoa a Samoa (SQA)
4. Galuega tauave a le Pulega
5. Malosiaga o le Pulega

**VAEGA III
O LE KOMITI FAATINO**

6. Sui Auai o le Komiti Faatino
7. Sui o Sui Auai
8. Totogi o Sui Auai
9. Fonotaga a le Komiti Faatino
10. Faailoaina o aia
11. E mafai e le Komiti Faatino ona faavae ni Komiti
12. Tuuina atu o malosiaga

**VAEGA IV
OFISA SILI O PULEGA
MA LE AUFALGALUEGA**

13. Ofisa Sili o Pulega
14. Tofiga o tagata faigaluega o le Pulega

**VAEGA V
FAATULAGAGA O
FAAIILOGA MA TUSI PASI
TAUALOA A SAMOA**

15. Faatulagaga o Faailoga ma Tusi Pasi Taualoa a Samoa
16. Faamauina o Faailoga ma Tusi Pasi Taualoa
17. Faamaumauga o tulaga ausia

**VAEGA VI
FAAMAUINA O LE
FAALAPOTOPOTOGA
E TUUINA ATU AOAOGA
FAAAUAU**

18. Talosaga mo le faamauina e avea o se faalapotopotoga e tuuina atu aoaoga faaaau

19. Tuuina atu, teena ma le faalēaogāina o se talosaga mo le faamauina e ave a o se faalapopotoga e tuuina atu aoaoga faaauau
20. Talosaga mo le faamauina ina ia faamalosiā i nisi tulaga

**VAEGA VII
FAAMAONIGA ALOAIA
O POLOKALAME**

21. O le faamaoniga aloaia o polokalame
22. Na o faalapopotoga ua faamauina e tuuina atu aoaoga faaauau latou te tuuina atu polokalame ua faamaonia aloaia

**VAEGA VIII
FUAITAU PUIPUA**

23. Talosaga mo maliega e faaaogāina ai fuaitau puipua

**VAEGA IX
SUESUEGA O TULAGA
AUPITO MANAOMIA**

24. Ia faatino e le Pulega suesuega o tulaga aupito manaomia

25. Faasilasilaga o le tausisia

**VAEGA X
TUPE**

26. Tupe maua ma totogifuapauina a le Pulega
27. Tausaga Faaletupe
28. Faamatalaga tau tupe, sueina faasuetusi ma Lipoti Faaletausaga
29. Tuusaunoaga mai Lafoga

**VAEGA XI
AIAIGA ESEESE**

30. Ia maua e le Pulega faamatalaga
31. Malosiaga e faamaonia ai pepa faatumu
32. Suesuega
33. Faamatalaga molimau
34. Talosaga a faalapopotoga e tuuina atu aoaoga faaauau mo vaegatupe a le Malo
35. Talosaga e faasaga i faaiuga
36. Puipuiga mai noataga
37. Tulafono Faatonutonu
38. Soloia
39. Aiaiga Faasaoina ma Aiaiga tau Soloaiga

2010, Nu. 9

O SE TULAFONO e faavae ai le Pulega o Faailoga ma Tusi Pasi Taualoa a Samoa, ina ia faatonuina ai ana galuega tauave, malosiaga ma tiute tauave ma mataupu e ono aliaie mai ai.

[7 Aperila 2010]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

VAEGA I FAATOMUAGA

1. Igoa puupuu ma le amataga-(1) E mafai ona taua leni Tulafono o le Tulafono o le Pulega o Faailoga ma Tusi Pasi Taualoa a Samoa 2010.

(2) O leni Tulafono e amata faamamaluina i le aso e tuuina i ai le maliega a Le Ao o le Malo.

2. Faamatalaina o uiga o upu - I totonu o leni Tulafono, ae vagana ai ua manaomia e le mataupu se isi uiga e ese ai:

“polokalame ua faamaonia aloaia” o lona uiga o se polokalame o aoga po o aoaoga ua faamaonia aloaia e le Pulega i lalo o leni Tulafono;

“faamaoniga aloaia” o lona uiga o se tualumaga ua faatonuina lea ua faamaonia ai e le Pulega se faalapotopotoga e tuuina atu aoaoga faaauau ina ia faia ni polokalame o Aoaoga Faaauau (PSET), ma ia aofia ai ae lē faatapulaaina i se tualumaga o iloiloga lea e iloiloaina ai tulaga gafatia lautele o se faalapotopotoga e tuuina atu aoaoga faaauau i le tuuina atu o lagolago mo se polokalame ua faamaotiina ma mautinoa ai e faapea, ua tuuina atu po o e ao ona tuuina atu le polokalame i se faiga e atoatoa lelei, talafeagai ma i le tulaga faataatia manaomia po o le tulaga maualuga e pei ona faamaonia e le Pulega;

“Pulega” o lona uiga o le Pulega o Faailoga ma Tusi Pasi Taualoa a Samoa ua faaauauina i lalo o le fuaiupu 3;

“Komiti Faatino” o lona uiga o le Komiti Faatino ua faavaeina i lalo o le fuaiupu 6;

“Ofisa Sili o Pulega” po o le “CEO” o lona uiga o le Ofisa Sili o Pulega o le Pulega ua tofia i lalo o le fuaiupu 13;

“faalapotopotoga mo le atinae o faailoga ma tusi pasi taualoa a le atunuu” o lona uiga o se tagata po o se

faalapotopotoga ua faamaonia e le Pulega ina ia avea o se faalapotopotoga mo le atinae o faailoga ma tusi pasi taualoa a le atunuu;

“faalapotopotoga e tuuina atu aoaoga faaauau i faatulagaga masani” o lona uiga o se faalapotopotoga e tuuina atu Aoaoga Faaauau lea o lo o i lalo o se tasi (1) po o le sili atu o vasega ua taua e faapea:

- (a) tuuina atu se polokalame faaleaoaoga e mafai ona ausia ai se faailoga ma tusi pasi taualoa ua faamauina i lalo o le Faatulagaga o Faailoga ma Tusi Pasi Taualoa a Samoa;
- (b) ua mauaina po o ua talosaga mo se faatupega mai le Malo po o mai se isi faalapotopotoga fesoasoani e ala atu i le Malo e tusa ai o so o se polokalame a faalapotopotoga e tuuina atu aoaoga faaauau ua faamoemoe ina ia ausia ai manaoga o faailoga ma tusi pasi taualoa;
- (c) ua faaaogā po o ua faamoemoe ina ia faaaogā se fuaitau puipuia i le igoa o le faalapotopotoga e tuuina atu aoaoga faaauau po o igoa o so o se mataupu o aoga, polokalame, faailoga ma tusi pasi taualoa lea e tuuina atu e le faalapotopotoga e tuuina atu aoaoga faaauau;
- (d) faaulufaleina o tagata aoga mai fafo mo se vaitaimi po o le sili atu i le lua (2) masina, i le tuufaatasiga i tausaga faakalena i so o se polokalame faaleaoaoga e tuuina atu e le faalapotopotoga e tuuina atu aoaoga faaauau;
- (e) o se faalapotopotoga e tuuina atu aoaoga faaauau i Samoa e tuuina atu ni polokalame po o ni mataupu i Samoa e ala atu i faatulagaga o tuaoi fesopoai e pei o le galulue faatasi, soofaatasi, faapaaga po o faatulagaga ua faatagaina ma faalapotopotoga e tuuina atu aoaoga faaauau i fafo; po o
- (f) o se faalapotopotoga e tuuina atu aoaoga faaauau i se atunuu i fafo o lo o faamoemoe ina ia tuuina atu aoaoga faaauau i Samoa.

- “Malo” o lona uiga o le Malo o le Atunuu Tutoatasi o Samoa;
- “Vaegatupe a le Malo” e aofia ai vaegatupe ua maua po o lo o faasoaina atu e le Malo mai so o se faalapotopotoga fesoasoani;
- “taiala” e tusa ai o fuaiupu 19 ma le 21 o lona uiga o se lisi o manaoga po o tuufaatasiga o ni faatonuga ua faamaonia e le Pulega lea e manaomia ona faamalieina po o le ausia e se faalapotopotoga e tuuina atu aoaoga faaauau ina ia faamaonia aloaia ana polokalame po o le faamauina ai e avea o se faalapotopotoga e tuuina atu aoaoga faaauau, i le tulaga e mafai ai, i lalo o lenei Tulafono;
- “faamatalaga” e tusa ai o le fuaiupu 30, o lona uiga o so o se pepa aloaia, pe faa-eletoroni po o se isi faiga e ese ai e faasino i gaoioiga a le faalapotopotoga e tuuina atu aoaoga faaauau ma e aofia ai ae lē faatapulaaina i faamaumauga o faailoga ma tusi pasi tauloa ua tuuina atu e le faalapotopotoga e tuuina atu aoaoga faaauau mo so o se vaitaimi o ana gaoioiga ua taua;
- “gaoioiga o le aoaoina” o lona uiga o se tualumaga faatulagaina o faatonuga e manaomia ona faia e se tagata ina ia ausia ai po o le maua ai o se taunuuga o le aoaoina;
- “taunuuga o le aoaoina” o lona uiga o so o se tulaga agavaa po o se malamalamaaga mulimuli po o tomai ua ausia e se tagata ona o se faaiuga o se aoga ma/po o gaoioiga faaleaoaoga;
- “isi faalapotopotoga e tuuina atu aoaoga faaauau i faatulagaga masani” o lona uiga o se faalapotopotoga e tuuina atu Aoaoga Faaauau e lē aloaia e avea o se faalapotopotoga e tuuina atu Aoaoga Faaauau;
- “Minisita” o lona uiga o le Minisita e nafa ma Aoga mai lea taimi i lea taimi;
- “faalapotopotoga” o lona uiga o se faalapotopotoga o tagata ua tuufaatasia faauletulafono pe lei foi o lo o latou auai i se faamoemoe e laugatasia uma ai, ma e aofia ai se inisetiute;

- “Aoaoga Faaauau” po o lona faapuupuuga o le “PSET” o lona uiga o ituaiga uma o gaoioiga tau aoaga ma aoaoga o lo o faia i fafo atu o faiga tau aoaoga o lo o faaaogāina ai so o se auala ua faatulagaina tau le aoaoina;
- “polokalame” o lona uiga o se faatulagaga ogatasi o mataupu, mataupu pupuu faaleaoaoga, pepa po o ni iunite ua fuafua e faamalieina ai manaoga o se faailoga ma tusi pasi taualoa;
- “fuitau puipuia” o lona uiga o se fuitau ua puipuia i lalo o le fuaiupu 23 o lenei Tulafono;
- “faalapotopotoga e tuuina atu aoaoga faaauau” o lona uiga o se faalapotopotoga po o se tagata ua faamoemoe e tuuina atu po o o lo o tuuina atu Aoaoga Faaauau (PSET) i Samoa;
- “faailoga ma tusi pasi taualoa” o lona uiga o le faamaoniga aloaia e faapea ua ausia ma le manuia e se tagata faaiuga uma o le aoaoina ma/po o agavaa talafeagai ina ia faailoagofie ai manaoga o tagata taitoatasi, tomai faapitoa, nofoaga o galuega po o nuu ma afioaga;
- “faamaoniga o tulaga aupito manaomia” ma “tulaga aupito manaomia ua faamaonia” e tusa ai o se faailoga ma tusi pasi taualoa, polokalame po o le gaoioiga tau aoaoga, o lona uiga e faapea o se faailoga ma tusi pasi taualoa, polokalame po o gaoioiga tau aoaoga ua aloaia e le Pulega ua ausia le taiala faataatitia ma tulaga faataatitia ua faamaonia mo le faamaonia po o le aloaia o le faailoga ma tusi pasi taualoa, polokalame po o le gaoioiga tau aoaoga i lalo o lenei Tulafono;
- “faamaumauga o le tulaga ausia” o lona uiga o se faamaumauga e manaomia ina ia tausia e le Pulega i lalo o le fuaiupu 17(1);
- “faamauina” o lona uiga o le faamauina i lalo o aiaiga o lenei Tulafono;
- “faailoga ma tusi pasi taualoa ua faamauina” o lona uiga o se faailoga ma tusi pasi taualoa ua faamauina i lalo o aiaiga o lenei Tulafono;

“faalapotopotoga ua faamauina e tuuina atu aoaoga faaaauau” o lona uiga o se faalapotopotoga ua faamauina e tuuina atu auunaga o Aoaoga Faaauau (PSET) i lalo o lenei Tulafono;

“Tulafono ua soloia” o lona uiga o le Tulafono o le Pulega o Faailoga ma Tusi Pasi Taualoa a Samoa 2006 lea ua soloia e lenei Tulafono;

“totogifuapauina talafeagai” o lona uiga o le totogifuapauina talafeagai ua fuafuaina e le Pulega i lalo o le fuaiupu 26(3);

“Faatulagaga o Faailoga ma Tusi Pasi Taualoa a Samoa” po o le “SQF” o lona uiga o le Faatulagaga o Faailoga ma Tusi Pasi Taualoa a Samoa ua faavaeina i lalo o le Vaega V o lenei Tulafono.

VAEGA II O LE PULEGA

3. Faaauauina o le Pulega o Faailoga ma Tusi Pasi Taualoa a Samoa (SQA)-(1) O le Pulega o Faailoga ma Tusi Pasi Taualoa a Samoa sa faavaeina i lalo o le Tulafono ua soloia e faaaauau pea i lalo o le igoa o le Pulega o Faailoga ma Tusi Pasi Taualoa a Samoa, ma e tatau ona i ai malosia, galuega tauave ma faatulagaga tau pulega ua aiaia e lenei Tulafono.

(2) E tatau i so o se sui, sui sooupu po o se tagata faigaluega o le Pulega o Faailoga ma Tusi Pasi Taualoa a Samoa lea sa faavaeina i lalo o le Tulafono ua soloia, e aunoa ma se isi pule faataga na i lo lenei Tulafono, ona faatatauina e faapea ua tofia e avea o se sui, sui sooupu po o se tagata faigaluega o le Pulega o Faailoga ma Tusi Pasi Taualoa a Samoa i lalo o lenei Tulafono i le tulaga tofi sa umia e lenei sui, sui sooupu, po o tagata faigaluega i le Pulega o Faailoga ma Tusi Pasi Taualoa a Samoa i le amataga o lenei Tulafono ma e mafai ona faamavae, aveesea po o le faateaina e tusa ai ma aiaiga o lenei Tulafono.

(3) E tatau i le Pulega ona:

- (a) i ai se soloaiga le motusia ma se faamau faailoga;
- (b) mafai ona faia se moliaga ma e molia foi i lona igoa ua tuufaatasia ai faaletulafono;

- (c) mafai ona faia ni konekarate, mauaina, umia ma faamatuu atu meatotino moni ma meatotino tau le tagata lava ia ma ia mafai ona faia isi gaoioiga uma ma mea e pei ona mafai e se faalapotopotoga ua tuufaatasia faaletulafono ona faia i se faiga faaletulafono; po o
- (d) mafai ona faatino isi pule ma malosiaga uma e tatau ai po o e faatelevave ai le faafoega talafeagai o lenei Tulafono.

(4) E tatau i le Ofisa Sili o Pulega ona tausia le faamau faailoga lea e tatau ona faatoa faapipii i se pepa aloaia e tusa ai o se iugafono a le Komiti Faatino, ma e tatau ona faamaonia e le saina a le Taitaifono o le Komiti Faatino po o i le toesea ai o le Taitaifono, e se sui auai e filifilia e le Komiti Faatino.

(5) Mo faamoemoega o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001, o le Pulega o Faailoga ma Tusi Pasi Taualoa a Samoa e tatau ona avea o se Faalapotopotoga Tau i Faamanuiaga a le Malo.

4. Galuega tauave a le Pulega-(1) O galuega tauave a le Pulega o le :

- (a) tuuina atu o fautuaga tau faiga faavae i le Malo e uiga i fuafuaga faataatitia ma vaega e ave i ai le faamuamua mo Aoaoga Faaauau (PSET);
- (b) mataitu ma lipoti atu i le Malo ma le vaega o Aoaoga Faaauau (PSET) e uiga i gaoioiga, tuuina atu o alaoa, ma le aotelega o le faatinoga o galuega a le vaega o Aoaoga Faaauau (PSET) e faasino i sini faataatia autu a le atunuu mo atinae tau le tamaoaiga, agafesootai ma le aganuu.
- (c) tuuina atu fautuaga i le Malo ma vaega o Aoaoga Faaauau (PSET), e uiga i sailiiliga ma tulaga e aliae mai i suesuega, le matituina po o iloiloga sa faatino e le Pulega po o isi lala sooupu, faalapotopotoga po o tagata;
- (d) faatonutonu faailoga ma tusi pasi taualoa ma tulaga faataatitia aupito i manaomia mo faalapotopotoga uma e tuuina atu Aoaoga Faaauau (PSET) i Samoa;

- (e) faamaopopo ma faamalosia Aoaoga Faaauau (PSET) uma, ina ia faaleleia le agai tonu atu o le vaega o Aoaoga Faaauau (PSET) i sini o le atinae a le atunuu ma ia uunaia ma atiae vaega uma mo le faatinoina lelei o polokalame;
- (f) uunaia sootaga ma auala e aoaoina ai i le va o le vaega o aoga ma le vaega o Aoaoga Faaauau (PSET), ma ia ofoina atu ni auaunaga tau fautuaga mo galuega;
- (g) atiae ma faafaigofie faiga faapaaga i le va o i latou e i ai a latou aia i tulaga faapisinisi, alamanuia, tomai faapitoa, vaega tumaoti ma faalapotopotoga i nuu ma afioaga ma faalapotopotoga o Aoaoga Faaauau (PSET);
- (h) galulue faatasi ma vaega o tagata i le atunuu e i ai a latou aia ina ia faamautu ai le faavaeina o tulaga aloaia ma manaoga tau aoaoga aemaise lava mo galuega tau matata eseese, tekinisia ma tomai faapitoa;
- (i) fuafuaina o se faatulagaga a le atunuu mo faailoga ma tusi pasi tauloa a Samoa, e aofia ai le faamatalaina o uiga o fuitau ina ia faamautu ma tausia ai pea le aloaia i le atunuu ma faava o malo o faailoga ma tusi pasi tauloa faapea le tulaga mautu ma lelei o faalapotopotoga o Aoaoga Faaauau (PSET);
- (j) atiae taiala faataatitia ma faiga mo le faamauina o faalapotopotoga uma e tuuina atu Aoaoga Faaauau (PSET);
- (k) atiae taiala faataatitia ma faiga mo le faamaoniga aloaia ma le suesueina o tulaga aupito manaomia o faalapotopotoga uma e tuuina atu Aoaoga Faaauau (PSET);
- (l) uunaia le faamaoniga o tulaga aupito manaomia i polokalame o aoaoga a isi faalapotopotoga e tuuina atu aoaoga faaaauau i faatulagaga masani;

- (m) galulue soosoo tauau ma faalapotopotoga uma e tuuina atu Aoaoga Faaauau (PSET), aemaise ia faamaonia o lo o latou faaaogāina faiga faavae o pulega aupito manaomia ma faiga e faamautuina ai o lo o mafai e faailoga ma tusi pasi tualoa ona ausia pe sili atu foi i tulaga aloaia faava o malo, ma ua ogatasi a latou polokalame ma vaega ua ave i ai le faamuamua a le atunuu;
 - (n) galulue faatasi ma lala sooupu a Malo i fafo faapea isi faalapotopotoga ina ia aloaia i totonu o Samoa ia faailoga ma tusi pasi tualoa mai fafo ma ia ausia tulaga aloaia faava o malo mo faailoga ma tusi pasi tualoa e tuuina atu i totonu o Samoa;
 - (o) tuuina atu faamaoniga e faapea o Aoaoga Faaauau (PSET) i totonu o Samoa o lo o faatumauina ai le tulaga tutusa faava o malo;
 - (p) tuufaatasia ma faatino le faamauina o faalapotopotoga e tuuina atu aoaoga faaaauau, faamaonia aloaia o faalapotopotoga e tuuina atu aoaoga faaaauau, polokalame, faamauina o faailoga ma tusi pasi tualoa, ma suesuega o tulaga aupito manaomia o faalapotopotoga e tuuina atu aoaoga faaaauau ma ia tausia tusi resitala talafeagai i lea itu; po o
 - (q) faatino so o se isi galuega tauave ua faaee atu i le Pulega e lenei Tulafono po o so o se isi Tulafono, po o e talosagaina e le Malo mai lea taimi i lea taimi.
- (2) E mafai e le Pulega ona feutagai ma so o se isi tagata po o se faalapotopotoga talafeagai, i le tauaveina o ana galuega tauave.

5. Malosiaga o le Pulega-(1) E tatau i le Pulega ona i ai malosiaga e pei ona tatau ai po o e ono tulai mai i le faatinoga lelei o ana galuega tauave.

(2) E aunoa ma le afaina i le tulaga lautele o aiaiga o le faafuuiupu (1), ma i le faaopoopo atu i so o se isi malosiaga ua aiaia e lenei Tulafono, e tatau i le Pulega ona i ai malosiaga nei:

- (a) e faatau mai, lisiina atu, toe lisi atu po o e mauaina i se isi faiga e ese ai ma umia so o se meatotino tusa lava pe mafai ona feaveai pe leai foi e manaomia mo le tauaveina o ana galuega tauave ma faamatuu atu so o sea meatotino ua lē toe manaomia mo ia faamoemoega;
- (b) ia atiae ona fanua po o isi meatotino ma faatutu ma tausia fale po o isi fausaga;
- (c) ia faatau mai, lisi atu po o le faatutu o fale mo le faaaogāina e ana tagata faigaluega;
- (d) ia ofi atu i so o se konekarate ma so o se tagata mo le tuuina atu i ai po o le tuuina atu e ia o so o se oloa po o auaunaga;
- (e) ia totogi ai so o se tupe alu ua ia faatupulaia i se tulaga alagatatau;
- (f) ia faia, lomua faasalalau, tuuina atu, faasalalau ma tufatufa, pe mo se tupe totogi po o se isi faiga e ese ai, pe tusia i pepa, faiga faa-eletoroni pe faamaneta ia lipoti, pepa, faasalalau faavaitaimi po o isi faamatalaga e ono mafai ona fesoasoani i le tauaveina o ana galuega tauave;
- (g) ia tuuina atu polokalame tau aoaoga faatasi ai ma le lagolago a isi lava tagata po o faalapotopotoga e pei ona manatu le Pulega ua talafeagai ai, mo ana tagata faigaluega po o isi tagata o aafia ai i le tauaveina o ana galuega tauave;
- (h) ia faaaogā ana meatotino, pe feaveai pe leai foi, i se faiga e pei ona manatu o ia ua talafeagai ai, e aafia ai le faia o nonogatupe e ala i le faaaogāina o ia meafaitino e avea ma faamalumaluga mo ia nonogatupe;
- (i) ia faavae se polokalame tau penisione po o isi polokalame tau tausiga mo le manuia o ona tagata faigaluega ina ia tusa ai ma faiga faavae a le Malo; ma
- (j) ia faia mea uma e ono tulai mai i so o sona malosiaga ma galuega tauave.

**VAEGA III
O LE KOMITI FAATINO**

6. Sui Auai o le Komiti Faatino-(1) E tatau ona pulea le Pulega e se Komiti Faatino, e aofia ai sui auai e toaiva (9) ma le Taitaifono, o ia lea e tatau ona nafa ma faiga faavae ma le pulega lautele o le Pulega.

(2) E tatau i le Komiti Faatino ona aofia ai:

- (a) le tagata e toatasi (1) e tofia e le Minisita i luga o le fautuaga a le Komiti Faatino e avea ma Taitaifono;
- (b) le Ofisa Sili o Pulega o le Matagaluega e nafa ma Aoaoga;
- (c) le Ofisa Sili o Pulega o le Matagaluega e nafa ma le Leipa;
- (d) le Ofisa Sili o Pulega o le Matagaluega e nafa ma Tina ma Tamaitai, Atinae o Nu'u ma Afioaga ma Agafesootai;
- (e) le Peresetene o le Asosi o le Au Gaosi Oloa ma i latou e Auina atu Oloa i Fafu o Samoa;
- (f) le Peresetene o le Faalapotopotoga a le Afaipisinisi ma Alamanuia;
- (g) o le Pule ma le Peresetene o le Iunivesite Aoa o Samoa;
- (h) le tagata e toatasi (1) e tofia e le Minisita e avea ma sui o Aoga Tumaoti ma faalapotopotoga e tuuina atu aoaoga faaauau; ma
- (i) le Ofisa Sili o Pulega o le Pulega.

(3) So o se tagata ua tofia e avea ma sui auai e tusa ai o le faafuuiupu (2)(a) ma le (h) e tatau ona:

- (a) aveesea mai le tofi e le Minisita ona ua lē atoatoa le malosi o le tino ma le mafaufau, lē lelei le faatinoga o galuega, gaumativa, faatamala i tiute tauave, ua lē mafai ona auai i se fonotaga a le Komiti Faatino i fonotaga sosoo e tolu (3) e aunoa ma se mafuaaga talafeagai, amio lē pulea po o ua tuua Samoa e lē toe foi mai;

(b) i le noatia ma le fai fuafua i le parakalafa (a), e umia le tofi mo se vaitaimi e tolu (3) tausaga ma e mafai ona agavaa mo le toe tofiaina; ma

(c) e agavaa e faamavae mai le tofi e ala i le faaooina atu o se faasilasilaga tusitusia i lea tulaga i le Minisita.

(4) E mafai e le Komiti Faatino ona valaauina so o se tagata e fesoasoani atu i so o sana fonotaga, ae vagana ai e faapea e lē tatau ona i ai le aia tatau a sea tagata e palota ai i so o se fonotaga a le Komiti Faatino.

(5) Afai o lo o i ai se avanoa ona o so o se mafuaaga i le tofi o le Taitaifono o le Komiti Faatino, e tatau i le Komiti Faatino ona tofia se tagata o ia lea e tatau ona galue e avea ma Taitaifono o le Komiti Faatino seia aulia sea taimi e tofia ai e le Minisita se Taitaifono fou i lalo o le faafuaiupu (2)(a).

(6) E amata mai le aso 1 o Iulai 2010:

(a) e lē tatau i se Sui Usufono o le Palemene, tagata faigaluega a le Malo po o se tagata ofisa faale-faavae ona avea ma sui auai po o e toe tofia e avea o se sui auai o le Komiti Faatino seia vagana ua faamaonia mai e le Kapeneta e faapea o sea tofiga po o le toe tofiaina o lea tagata ua talafeagai; ma -

(i) e mo le manuia o tagata lautele; ma

(ii) e faapea o le sui usufono o le Palemene, tagata faigaluega o le Malo po o le tagata ofisa faale-faavae, po o le a lava le tulaga e mafai ai, e i ai ona faailoga ma tusi pasi taualoa faapitoa po o tomai faapisinisi lea e manaomia e le Pulega i lana Komiti Faatino, ma e lē maua ia faailoga ma tusi pasi taualoa po o tomai faapisinisi i se isi nofoaga; ma

(b) afai ua tofia po o ua toe tofia se sui usufono o le Palemene, tagata faigaluega a le Malo po o se tagata ofisa faale-faavae i lalo o lenei fuaiupu,

e lē tatau i lea tagata ona mauaina lona totogi po o isi faamanuiaga mai le Pulega mo auunaga e avea ai o se sui auai o le Komiti Faatino.

7. Sui o Sui Auai-(1) Afai e i ai se sui auai o le Komiti Faatino ua lē mafai ona galue mo se taimi lē tumau mo so o se mafuaaga tatau mai le auai i se fonotaga a le Komiti Faatino, e mafai e sea sui auai e ese mai le Taitaifono ona faatagaina se tagata ofisa sinia mai lana Matagaluega, lala sooupu, kamupani, sosaiete po o le faalapotopotoga, po o le a lava le tulaga e mafai ai, ina ia auai i lena fonotaga e avea ma sui o sea sui auai.

(2) E tatau i so o se sui o sui auai i le taimi o galue ai i sea tulaga, ona avea e faapea o se sui auai o le Komiti Faatino.

(3) O le tofiga o so o se sui o se sui auai ma so o se gaoioiga ua faia e le sui o se sui auai o le Komiti Faatino e tatau ona:

- (a) lē fesiligia i so o se taualumaga i luga o le mafuaaga e faapea o le taimi mo le tofiga o le sui o le sui auai e le i tulai mai po o ua faamutaina;
- (b) le avea o se mafuaaga e faalēaogā ai faaiuga a le Pulega sa faia a o faagasolo so o se fonotaga lea sa faapea sa galue ai lea sui o le sui auai e pei ona tofia.

8. Totogi o Sui Auai - E tatau ona totogi i sui auai ma sui o sui auai o le Komiti Faatino ia totogi, alauni o fonotaga, tupe alu i malaga ma isi tupe alu e mafai ona faatulaga e le Kapeneta mai lea taimi i lea taimi.

9. Fonotaga a le Komiti Faatino-(1) E mafai e le Taitaifono ona valaau fonotaga a le Komiti Faatino ina ia faia i taimi uma e pei ona manaomia i ia taimi ma ia nofoaga, e pei ona o le a fuafuaina e le Taitaifono mai lea taimi i lea taimi ae vagana ai e faapea:

- (a) e tatau i le Komiti Faatino ona fono a itiiti mai e faa-tasi i le tai lua (2) masina;
- (b) i luga o le talosaga tusitusia a nisi sui auai o le Komiti Faatino a itiiti mai o le toalua (2), e tatau i le Ofisa Sili o Pulega ona valaau se fonotaga

a le Komiti Faatino i se aso e lē silia le 14 aso i le maea ai ona taulimaina le talosaga.

(2) O le numera o sui auai e mafai ai ona faia se fonotaga uma a le Komiti Faatino a itiiti mai e tatau ona toalima (5).

(3) So o se mataupu e tulai mai i se fonotaga a le Komiti Faatino e tatau ona faia i ai se faaiuga e se vaega fulisia o sui auai o lo o auai ma palota, ma i le tulaga o le tutusa o palota, e tatau i le Taitaifono ona palota e faia ai se faaiuga.

(4) E tatau ona tuuina atu poloaiga ma faatonuga uma a le Komiti Faatino i lalo o le saina a le Ofisa Sili o Pulega po o, i le toesea ai o le Ofisa Sili o Pulega e se sui auai ua faatagaina patino ma tofia e le Komiti Faatino.

(5) E tatau i le Komiti Faatino ona tausia lelei oototoga o mataupu o ana taualumaga i fonotaga.

(6) E tatau ona taitaia e le Taitaifono fonotaga taitasi uma a le Komiti Faatino, po o i le toesea ai o le Taitaifono, e se sui auai ua filifilia e se vaega fulisia o sui auai o le Komiti Faatino o lo o auai i sea fonotaga ina ia taitaia le fonotaga.

10. Faailoaina o aia-(1) E tatau i se sui auai o le Komiti Faatino o ia lea e i ai sana aia tuusao pe leai foi po o aia tau tupe a le sui auai lava ia i so o se mataupu e oo atu i luma o le Komiti Faatino, i taimi taitasi ma taimi uma e oo mai ai le mataupu i luma o le Komiti Faatino, ma i le taimi lava e mafai ai talu ona oo mai ia faamatalaga moni talafeagai i le silafia e le sui auai, ona faailoaina atu lana aia i le mataupu.

(2) I le noatia ma le fai fuafua i le faafuaiupu (3), e tatau ona faamauiina le faailoaina o aia i lalo o le faafuaiupu (1) i totonu o oototoga o taualumaga o fonotaga a le Komiti Faatino ma e lē tatau i le sui auai ona:

(a) auai a o faagasolo so o se filifiliga a le Komiti Faatino e tusa ai o lea mataupu; ma

(b) auai i so o se filifiliga po o se palota a le Komiti Faatino e tusa ai o lea mataupu.

(3) Afai ona o se taunuuga i le faaaogāina o le faafuaiupu (2) ua lē mafai e le Komiti Faatino ona tausia se numera o sui usufono e mafai ai ona faia se fonotaga ina ia faia ai se faaiuga

o se mataupu, e mafai e le sui auai po o sui auai o le Komiti Faatino o lo o aafia ai, ina ua uma ona usitaia le faafuaiupu (1), ona auai atu i so o se filifiliga a le Komiti Faatino e uiga i le mataupu ma e mafai ona palota i le mataupu ma e tatau ona faamauina i totonu o ootoga o mataupu o tualumaga o le fonotaga a le Komiti Faatino le mafuaaga o le auai o sui aafia po o le lē auai o sui i so o se filifiliga ma palota.

11. E mafai e le Komiti Faatino ona faavae ni Komiti-(1) E mafai e le Komiti Faatino ona faavae ni komiti faapitoa ma e mafai ona ia tuuina atu i so o sea komiti so o se mataupu mo le iloiloina, suesueina po o le faafoeina.

(2) E mafai e le Komiti Faatino e ala i se iugafono faapitoa i so o sana fonotaga ona faaaogā tulafono faafoe tusitusia o tualumaga mo ia komiti.

12. Tuuina atu o malosiaga-(1) E mafai e le Komiti Faatino, i se tulaga lautele po o e pei ona aiaia se isi tulaga e ese ai e le pepa faamaonia o le tuuina atu o malosiaga i lalo o lana faamau faailoga, ona tuuina atu i le Ofisa Sili o Pulega po o i se tasi (1) o ona sui auai, so o se malosiaga ma malosiaga o le Pulega i lalo o lenei Tulafono, e ese mai na i lo malosiaga i lalo o le fuaiupu 13 ma lenei malosiaga na tuuina atu ai.

(2) Afai o se malosiaga e tuuina atu i lalo o le faafuaiupu (1) e faasino i le tuuina atu o se laisene po o tusi faamaonia, e lē tatau i le Ofisa Sili o Pulega ona tuuina atu lea laisene po o tusi faamaonia vagana ua tusa ai ma tuutuuga o le tuuina atu o malosiaga, faatonuga, taiala po o aiaiga ua faaeeina atu i ai e le Komiti Faatino.

(3) E tatau i se malosiaga ua tuuina atu i lalo o le faafuaiupu (1), ina ua faatinoina e le Ofisa Sili o Pulega, ona faatatauina e faapea sa faatinoina e le Pulega.

(4) O le tuuina atu o malosiaga i lalo o lenei fuaiupu e le taofia mai ai le faatinoina o so o se malosiaga e le Komiti Faatino.

(5) O se malosiaga ua tuuina atu i lalo o lenei fuaiupu e mafai ona faalēaogāina i le faitalia a le Komiti Faatino.

VAEGA IV
OFISA SILI O PULEGA MA LE AUFALUEGA

13. Ofisa Sili o Pulega-(1) E tatau ona tofia le Ofisa Sili o Pulega e Le Ao o le Malo i le faia i luga o le fautuaga a le Kapeneta.

(2) E mafai ona iloilo e le Kapeneta se fautuaga ua faia e le Komiti Faatino e uiga i le tofiga o le Ofisa Sili o Pulega.

(3) E mafai e le Komiti Faatino ona fautuaina le Kapeneta i se tagata talafeagai e ao ona tofia e avea o le Ofisa Sili o Pulega.

(4) O le Ofisa Sili o Pulega e tatau ona avea o le Ofisa Sili o Pulega o le Pulega ma e tatau ona faaopoopo i ai le faatinoga o isi ia galuega tauave ma le faatinoina o isi malosiaga e pei ona ua faaee atu ia te ia mai lea taimi i lea taimi e lenei Tulafono po o so o se isi Tulafono po o tulafono faatonutonu.

(5) E mafai e le Ofisa Sili o Pulega, faatasi ai ma le faamaoniga a le Komiti Faatino, ona tuuina atu i se tagata faigaluega o le Pulega le faatinoga o so o se galuega tauave a le Ofisa Sili o Pulega po o le faatinoina o so o se malosiaga o le Ofisa Sili o Pulega.

(6) E mafai ona aveeseina pe faamalolo lē tumau mai le tofiga le Ofisa Sili o Pulega e le Kapeneta i luga o le fautuaga a le Komiti Faatino mo ni mafuaaga tatau ma e tatau ona agavaa mo le toe tofiaina i le maea ai o vaitaimi o le tofiga.

(7) I le tulaga ina ua lē mafai ona toe galue, toesea, aveeseina po o le faamaloloina lē tumau mai le tofiga o le Ofisa Sili o Pulega, e tatau i le Komiti Faatino ona tofia se isi tagata ina ia galue e avea o le Sui Ofisa Sili o Pulega i lalo o lenei Tulafono seia tofia le Ofisa Sili o Pulega po o ua toe amata i lona tofi.

14. Tofiaina o tagata faigaluega o le Pulega-(1) I le noatia ma le fai fuafua i aiaiga o le faiga faavae a le Malo e pei ona faamamaluina mai lea taimi i lea taimi, e mafai e le Pulega ona tofia, i ia totogi ma i luga o ia tuutuuga ma aiaiga e pei ona ia manatu ua talafeagai ai, ia tagata faigaluega, sooupu, faufautua po o tagata e faia feutagaiga e pei ona ia manatu e talafeagai mo le faataunuina lelei ma le atoatoa o ana galuega

tauave, ma e mafai ona ia faateaina so o sea tagata faigaluega, sooupu, faufautua po o tagata e faia feutagaiga e pei ona fuafuaina e le Pulega.

(2) E mafai e le Pulega ona faia tulafono faafoe mo le faatonotonuina faaletulafono o tuutuuga o auaunaga, amio pulea ma aoaoga o tagata uma o lo o faafaigaluegaina e po o faigaluega e ave ma sui o le Pulega.

(3) E tatau i tagata faigaluega ma isi tagata o lo o faia faatinoga e ave ai ma sui o le Pulega ona tali atu i ma e i lalo o le faafoega a le Ofisa Sili o Pulega.

VAEGA V FAATULAGAGA O FAAILOGA MA TUSI PASI TAUALOA A SAMOA

15. Faatulagaga o Faailoga ma Tusi Pasi Tauloa a Samoa-(1) Ua faavaeina nei le Faatulagaga o Faailoga ma Tusi Pasi Tauloa a Samoa.

(2) O le Faatulagaga o Faailoga ma Tusi Pasi Tauloa a Samoa o se faiga ua faavasegaina e iloa ai le tulaga ma ituaiga o faailoga ma tusi pasi tauloa ua faamaonia o latou tulaga manaomia ia e mafai ona aofia ai i le faavasegaga e pei ona mafai ona faatonuina e tulafono faatonotonu.

16. Faamauina o Faailoga ma Tusi Pasi Tauloa-(1) I le noatia ma le fai fuafua i le faafuaiupu (2), so o se faalapotopotoga e tuuina atu aoaoga faaauau po o se faalapotopotoga mo le atinae o faailoga ma tusi pasi tauloa e mafai ona talosaga i le Pulega ia faamauina se faailoga ma tusi pasi tauloa.

(2) E ui lava i le faafuaiupu (1), so o se faalapotopotoga e tuuina atu aoaoga faaauau po o se faalapotopotoga mo le atinae o faailoga ma tusi pasi tauloa a le atunuu, e tatau ona talosaga i le Pulega mo le faamauina o ana faailoga ma tusi pasi tauloa a le atunuu i luga o le Faatulagaga o Faailoga ma Tusi Pasi Tauloa a Samoa.

(3) E mafai e le Pulega ona faamauina se faailoga ma tusi pasi taualoa pe afai ua faamalieina e faapea ua faamalieina tulaga faataatitia ua faatonuina ma taiala faataatitia mo le faamauina o faailoga ma tusi pasi taualoa ma po o ai e totogiina le totogifuapauina talafeagai.

(4) E tatau i le Pulega ona faavaeina ma faatumauina se faamaumauga o faailoga ma tusi pasi taualoa uma sa maua, ausia pe sa ofoina atu i totonu o Samoa, e ala i faalapotopotoga e tuuina atu Aoaoga Faaauau (PSET).

(5) E tatau ona avea o se soligatulafono mo so o se tagata po o se faalapotopotoga e tuuina atu aoaoga faaauau le:

(a) tuuina atu o so o se faamatalaga e taufaasese ai le faamoemoe, igoa, taunuuga po o le maualuga o se faailoga ma tusi pasi taualoa ua faamauina e le Pulega;

(b) maua mai i se tulaga pepelo po o le taufaasese, pe tuufofoga po o se faiga tusitusia e faapea sa faamauina se faailoga ma tusi pasi taualoa e le Pulega i lalo o lenei fuaiupu; po o

(c) ua lē talosaga ma lona iloa lelei mo le faamauina i luga o le Faatulagaga o Faailoga ma Tusi Pasi Taualoa a Samoa i lalo o lenei Vaega pe afai e manaomia ina ia faapea ona fai i lalo o le faafuaiupu (2).

(6) So o se tagata po o se faalapotopotoga e tuuina atu aoaoga faaauau, o ia lea ua faia se soligatulafono i lalo o le faafuaiupu (5) ma i luga o se moliaga ua faamaonia faaletulafono e tatau ona noatia e totogi se sala tupe e lē silia le 100 iunite tau faasalaga ma le 10 iunite tau faasalaga mo aso taitasi lea e faaauau ai le soligatulafono.

17. Faamaumauga o tulaga ausia-(1) E tatau i le Pulega ona faavaeina ma faatumauina se faamaumauga, e tusa lava pe faa-eletoroni po o i se isi faiga e ese ai o:

(a) faailoga ma tusi pasi taualoa ua faamauina, pe o le tulaga atoa po o vaega laiti o ia faailoga ma tusi pasi taualoa; ma

(b) taunuuga ua ausia tau aoaoga po o agavaa talafeagai o gaoioiga o le aoaoina i tulaga aupito manaomia ua faamaonia e le Pulega, ua maua po o ua ausia e so o se tagata i totonu o Samoa.

(2) E mafai e le Pulega ina ua faamalieina e faapea ua talafeagai ona faia faapea i tulaga aliae mai, ma ua maua le totofiguapauina talafeagai, ona tuuina atu se faamaoniga e faasino i se faamaumauga o tulaga ausia i luga o se talosaga a so o se tagata.

(3) So o se tagata o ia lea:

(a) ua aunoa ma se mafuaaga faaletulafono e faalavelave ai i le faamaumauga o tulaga ausia ua teuina e le Pulega i lalo o lenei Tulafono; po o

(b) e aunoa ma se mafuaaga faaletulafono e faalavelave ai i se faamaumauga o se tusi faamaonia o tulaga ausia ua tuuina atu e le Pulega i lalo o lenei Tulafono, ina ia taitaisese ai pe tuuina atu ai faamatalaga taufaasese e faasino i se faailoga ma tusi pasi tauloa ua tuuina atu i se tagata,

e tatau ona nofosala i se soligatulafono ma i luga o se moliaga ua faamaonia faaletulafono, e tatau ona noatia i se sala tupe e lē silia le 50 iunite tau faasalaga.

VAEGA VI FAAMAUINA O LE FAALAPOTOPOTOGA E TUUINA ATU AOAOGA FAAAUAU

18. Talosaga mo le faamauina e avea o se faalapotopotoga e tuuina atu aoaoga faaauau-(1) E mafai e se pulega a se faalapotopotoga, pe ua faavaeina i totonu po o fafo atu o Samoa, ona talosaga i le Pulega mo le faamauina o le faalapotopotoga e avea o se faalapotopotoga aloaia e tuuina atu Aoaoga Faaauau (PSET), mo faamoemoega o lenei Tulafono.

(2) O se talosaga mo le faafouga o le faamauina e tatau ona faia i tausaga taitasi e le pulega o le faalapotopotoga lea ua faamauina i lalo o lenei Tulafono.

(3) O se talosaga i lalo o lenei fuaiupu mo le faamauina o se faalapotopotoga e tatau ona:

(a) i totonu o le pepa faatumu; ma

(b) tuuina atu faatasi ma le totogifuapauina ua faamaonia,

e pei ona mafai ona fuafuaina e le Pulega.

(4) E ui lava i so o se mea i totonu o lenei Tulafono, o so o se faalapotopotoga e tuuina atu Aoaoga Faaauau (PSET) aloaia a o lumanai ai le faamamaluina o lenei Tulafono e tatau ona avea e faapea e ono faamauina i lalo o lenei Tulafono, ae peitai e mo na o le 12 masina muamua mai le aso e faamamaluina ai lenei Tulafono.

(5) E tatau i le Pulega ona faatumauiina se tusi resitala o faalapotopotoga uma e tuuina atu Aoaoga Faaauau (PSET) mo faamoemoega o lenei Tulafono.

19. Tuuina atu, teena ma le faalēaogāina o se talosaga mo le faamauina e avea o se faalapotopotoga e tuuina atu aoaoga faaauau-(1) I le noatia ma le fai fuafua i le

faafuaiupu (3), e mafai e le Pulega ona tuuina atu po o le teena o se talosaga mo le faamauina o se faalapotopotoga e tuuina atu aoaoga faaauau, i le maea ai o ana iloiloga o tulaga faataatitia taiala faataatitia, faagasologa ma totogifuapauina ua talafeagai i le tuuina atu po o le teena ai o se talosaga mo le faamauina i lalo o lenei Tulafono.

(2) E ui lava i so o se mea i totonu o lenei Tulafono, e mafai e le Pulega ona faalēaogāina le faamauina o se faalapotopotoga e tuuina atu aoaoga faaauau, pe afai ua ia manatu e faapea o sea faalēaogāina ua tusa ai ma taiala faataatitia ua faatonuina ma faagasologa ua manaomia i lalo o lenei Tulafono.

(3) E ui lava i le faafuaiupu (1) ua i ai i le Pulega le malosiaga, pe afai ua ia manatu ua talafeagai ai, e tuuina atu ai taiala talafeagai i le faalapotopotoga e tuuina atu aoaoga faaauau, ia tausisia ai taiala ma tulaga faataatitia ua faatonuina ina ia mafai ai ona faamauina i latou i lalo o lenei Tulafono, na i lo le teena o se talosaga mo le faamauina.

20. Talosaga mo le faamauina ina ia faamalositia i nisi tulaga-(1) E ui lava i so o se mea i totonu o leni Tulafono, e tataui i so o se faalapotopotoga e tuuina atu aoga faaauau ona talosaga mo le faamauina ma ia tausia tulaga faataatitia aupito manaomia, pe afai ua aofia ai sea faalapotopotoga e tuuina atu aoga faaauau i totonu o le tasi (1) po o le sili atu o faavasegaga ua taua e faapea:

- (a) tuuina atu se polokalame faaleaoga e mafai ona ausia ai se faailoga ma tusi pasi taualoa ua faamauina i lalo o le Faatulagaga o Faailoga ma Tusi Pasi Taualoa a Samoa;
- (b) ua mauaina po o ua talosaga mo se faatupega mai le Malo po o mai se isi faalapotopotoga fesoasoani e ala atu i le Malo e tusa ai o so o se polokalame a faalapotopotoga e tuuina atu aoga faaauau ua faamoemoe ina ia ausia ai manaoga o faailoga ma tusi pasi taualoa;
- (c) ua faaogā po o ua faamoemoe ina ia faaogā se fuaitau puipuia i le igoa o le faalapotopotoga e tuuina atu aoga faaauau po o igoa o so o se mataupu o aoga, polokalame, faailoga ma tusi pasi taualoa lea e tuuina atu e le faalapotopotoga e tuuina atu aoga faaauau;
- (d) faaulufaleina o tagata aoga mai fafo mo se vaitaimi po o le sili atu i le lua (2) masina, i le tuufaatasiga i tausaga faakalena i so o se polokalame faaleaoga e tuuina atu e le faalapotopotoga e tuuina atu aoga faaauau;
- (e) o se faalapotopotoga e tuuina atu aoga faaauau i Samoa e tuuina atu ni polokalame po o ni mataupu i Samoa e ala atu i faatulagaga o tuaoi fesopoai e pei o le galulue faatasi, soofaatasi, faapaaga po o faatulagaga ua faatagaina ma faalapotopotoga e tuuina atu aoga faaauau i fafo; po o
- (f) o se faalapotopotoga e tuuina atu aoga faaauau i se atunuu i fafo o lo o faamoemoe ina ia tuuina atu aoga faaauau i Samoa.

(2) O le faamauina taitasi uma e manaomia i lalo o lenei fuaiupu e tatau ona faia faaletausaga mulimuli ane ai.

(3) So o se faalapotopotoga e tuuina atu aoaoga faaauau e le i faamauina e pei ona manaomia ai i lalo o lenei fuaiupu, ua faia se soligatulafono ma e tatau ona noatia i se sala tupe e lē silia le 1,000 iunite tau faasalaga i luga o le moliaga ua faamaonia faaletulafono, ma le 100 iunite tau faasalaga mo aso taitasi lea e faaauau ai le soligatulafono.

VAEGA VII FAAMAONIGA ALOAIA O POLOKALAME

21. O le faamaoniga aloaia o polokalame-(1) E mafai e se faalapotopotoga e tuuina atu aoaoga faaauau ona talosaga i le Pulega mo le faamaoniga aloaia o ana polokalame.

(2) I le noatia ma le fai fuafua i le faafuaiupu (4) e mafai e le Pulega ona tuuina atu pe teena faamaoniga aloaia o le polokalame ma faaee atu ia tuutuuga e pei ona mafai ona fuafuaina e le Pulega mai lea taimi i lea taimi.

(3) O se talosaga i lalo o lenei fuaiupu e tatau ona aumai i totonu o le pepa faatumu ma aumai faatasi ma se totogifuapauina e pei ona mafai ona fuafuaina e le Pulega mai lea taimi i lea taimi.

(4) E ui lava i le faafuaiupu (2) e i ai i le Pulega le malosiaga pe afai ua ia manatu ua talafeagai ai, e tuuina atu ai taiala ua faamaonia e le Pulega i faalapotopotoga e tuuina atu aoaoga faaauau ua aafia, ia tausisia ai tulaga ma taiala faataatitia ua faatonuina, ina ia faataga ai la latou talosaga ia iloiloia mo le faamaoniga aloaia o ana polokalame, na i lo le teena o se talosaga mo le faamaonia aloaia o se polokalame.

(5) So o se tagata po o se faalapotopotoga e faapea ua maua mai i se faiga taufaasese po o se faiga pepelo e faapea ua latou ofoina atu, tuuina atu, po o ua faia se polokalame lea ua faamaonia aloaia e le Pulega, ua faia se soligatulafono ma e tatau ona noatia i se sala tupe e lē silia le 10,000 iunite tau faasalaga i luga o le moliaga ua faamaonia faaletulafono, ma le 100 iunite tau faasalaga mo aso taitasi lea e faaauau ai le soligatulafono.

22. Na o faalapotopotoga ua faamauina e tuuina atu aoaoga faaauau latou te tuuina atu polokalame ua faamaonia aloaia-(1) E lē tatau i se faalapotopotoga e tuuina atu aoaoga faaauau ona tuuina atu se polokalame aloaia seia vagana ai o se faalapotopotoga faamauina e tuuina atu aoaoga faaauau.

(2) So o se tagata o ia lea ua faalavelave i aiaiga o le faafuuiupu (1) ua faia se soligatulafono ma e tatau ona noatia i se sala tupe e lē silia le 100 iunite tau faasalaga i luga o le moliaga ua faamaonia faaetulafono, ma le 10 iunite tau faasalaga mo aso taitasi lea e faaauau ai le soligatulafono.

VAEGA VIII FUAITAU PUIPUA

23. Talosaga mo maliega e faaaogāina ai fuaitau puipua-(1) I le noatia ma le fai fuafua i le faafuuiupu (2), e tatau i le faalapotopotoga faamauina e tuuina atu aoaoga faaauau ona talosaga i le Pulega mo lana maliega ia faaaogāina ai fuaitau “tikeri”, “tikeri o faatufugaga”, “fomai o le tofa manino”, “matua o faiva o faatufugaga”, “Iunivesite”, “Samoa”, “tau Samoa”, “Atunuu”, e aofia ai faaliliuga o nei fuaitau i totonu o le gagana masani, pe afai ua faamoemoe le faalapotopotoga e tuuina atu aoaoga faaauau:

- (a) e faaaogā ia upu mo le faamoemoe e faaigoaina ai le faalapotopotoga e tuuina atu aoaoga faaauau; po o
- (b) e faaaogā ia upu mo le faamoemoe e faaigoaina ai faailoga ma tusi pasi taualoa o le a tuuina atu e le faalapotopotoga e tuuina atu aoaoga faaauau.

(2) E ui lava i le faafuuiupu (1), pe afai ua faavaeina se faalapotopotoga e tuuina atu aoaoga faaauau e ala i se Tulafono a le Palemene, e lē tatau i lea faalapotopotoga e tuuina atu aoaoga faaauau ona manaomia e sailia se maliega mo le faamoemoe o le faaigoaina o le faalapotopotoga e tuuina atu aoaoga faaauau, i lalo o lenei fuaiupu.

(3) E mafai e le Pulega, i luga o le mauaina o se talosaga i lalo o le faafuaiupu (1) ma totogifuapauina talafeagai, tuuina atu, toe faai i tua po o le faataatia ese lē tumau le maliega a le Pulega i se faiga e ogatasi ai ma taiala faataatitia ma faagasologa ua faatonuina.

(4) So o se tagata po o se faalapotopotoga e tuuina atu aoaoga faaauau, o ia lea ua faalavelave i aiaiga o le faafuaiupu (1), ua faia se soligatulafono ma e tatau ona noatia i se faasalaga e lē silia le 10,000 iunite tau faasalaga, ma le 100 iunite tau faasalaga mo aso taitasi uma lea e faaauau ai le soligatulafono.

VAEGA IX SUESUEGA O TULAGA AUPITO MANAOMIA

24. Ia faatino e le Pulega suesuega o tulaga aupito manaomia-(1) E tatau i le Pulega ona iloilo se tulaga manuia o se faalapotopotoga e tuuina atu aoaoga faaauau e faasaga i tulaga ma taiala faataatitia aupito manaomia ma mataituina e faapea o lea faalapotopotoga e tuuina atu aoaoga faaauau, o lo o faaauau pea ona tausisia tulaga ma taiala faataatitia sa faatonuina.

(2) So o se tau ua faaee atu e le Pulega mo le tauaveina o se suesuega o tulaga aupito manaomia i lalo o le faafuaiupu (1) e tatau ona totogi e le faalapotopotoga e tuuina atu aoaoga faaauau ma e tatau ona ave ma aitalafu e totogi atu i le Pulega pe afai ua lē mafai e le faalapotopotoga e tuuina atu aoaoga faaauau ona totogiina i totonu o le lua (2) masina i le maea ai o le suesuega.

25. Faasilasilaga o le tausisia-(1) E mafai e le Pulega, ona tuuina atu se faasilasilaga o le tausisia, i se faalapotopotoga e tuuina atu aoaoga faaauau pe afai ua faamalieina le Pulega e faapea, o le faalapotopotoga e tuuina atu aoaoga faaauau e le o tausisia so o se manaoga sa faatonuina mo le faatumauina o lona tulaga e faamauina ai ma le faamaonia aloaia o ana polokalame.

(2) E ui lava i so o se mea i totonu o lenei Tulafono, ae peitai i le noatia ma le fai fuafua i le fuaiupu 35, e mafai e le Pulega ona faalēaogāina po o le faataatia ese lē tumau le

faamaonia aloaia o polokalame, le faamauina o faailoga ma tusi pasi tauloa, po o le faamauina o se faalapotopotoga e tuuina atu aoaoga faaauau pe afai o le a lē tausisia e le faalapotopotoga e tuuina atu aoaoga faaauau se faasilasilaga o le tausisia.

(3) E leai se mea i totonu o lenei fuaiupu e tatau ona faasaina ai le aia tatau a se faalapotopotoga e tuuina atu aoaoga faaauau e toe talosaga ai mo le faamauina po o le toe faamaonia aloaia o ana polokalame pe afai ua tausisia manaoga o le faamauina po o le faamaonia aloaia.

VAEGA X TUPE

26. Tupe maua ma totogifuapauina a le Pulega-(1) O tupe maua a le Pulega e tatau ona aofia ai:

- (a) ia totogifuapauina, tau faaee atu ma faasalaga tau tupe e tatau ona totogiina i lalo o lenei Tulafono po o so o se isi Tulafono po o tulafono faatonutonu e pei ona ua mafai ona tuuina atu i le Pulega e lena Tulafono po o tulafono faatonutonu;
- (b) tupe faameaalofa e pei ona mafai mai lea taimi i lea taimi ona tuuina atu i ai e le Malo;
- (c) nisi lava tupe e pei ona mafai ona faatupulaia i se tulaga talafeagai mo le Pulega mai i so o se isi alatupe.

(2) Ina ia tusa ai ma so o se faiga faavae a le Malo ma so o se tulafono talafeagai, e mafai e le Pulega ona teu faafaigaluega so o se vaega o ana tupe ia e le o manaomia vave i le taimi lea mo le faataunuuina o ana galuega tauave.

(3) E mafai e le Pulega ona fuafua mai lea taimi i lea taimi e ala i le Faasilasilaga ua tuuina atu i le Savali:

- (a) le ituaiga totogifuapauina e ono totogiina;
- (b) le fua faatatau lea o le a vaevaeina i ai ia totogifuapauina;
- (c) le aofaiga o ia totogifuapauina,

e tusa ai o so o se mataupu i lalo o lenei Tulafono.

27. Tausaga Faaletupe - O le Tausaga Faaletupe a le Pulega e tatau ona amata i le aso 1 o Iulai o tausaga taitasi ma e tatau ona faaiuina i le aso 30 o Iuni o le tausaga mulimuli ane ai.

28. Faamatalaga tau tupe, sueina faasuetusi ma Lipoti Faaletausaga-(1) E tatau i le Pulega ona tausia ni faamatalaga tau tupe atoatoa ma faamaumauga o feuiaiga faapisinisi ma mataupu a le Pulega ma e tatau ona faia mea uma e talafeagai ina ia faamautu ai e faapea:

- (a) o vaegatupe uma e maua ua faamauina i totonu o faamatalaga tau tupe;
- (b) o tupe totogi uma ua i ai faamaoniga tatau ma sao ona faia ma faamaumuina mo; ma
- (c) o lo o i ai puipuiga e atoatoa a le Pulega i ana -
 - (i) aseta;
 - (ii) meatotino i lalo o le faafoega a le Pulega;
 - (iii) tupe alu a le Pulega; ma
 - (iv) noataga.

(2) E tatau ona noatia le Pulega i aiaiga o le Tulafono o Pulega o Tupe a le Malo 2001 ma mo leni faamoemoe, e ui lava o aiaiga o lea Tulafono, e tatau i tupe ua maua e le Pulega ona faatatauina e faapea o tupe a le Malo ma o aseta ma meatotino a le Pulega e tatau ona faatatauina e faapea o meatotino a le Malo.

(3) E tatau i le Pulega ona faia ma tuuina atu i le Minisita, i totonu o le ono (6) masina i le tuanai ai o le faaiuga o le tausaga faaletupe a le Pulega, se lipoti faaletausaga o lo o aofia ai:

- (a) faamatalaga tau tupe mo le tausaga faaletupe;
- (b) faailoga e iloa ai le faatinoga o galuega ma ia faamatalaga e pei ona mafai ona faatonuina e le Minisita o Tupe;
- (c) se lipoti e uiga i le faagaoioiga o le Pulega a o faagasolo le tausaga faaletupe ua tuanai atu; ma
- (d) nisi lava faamatalaga e pei ona mafai ona manaomia e le Kapeneta.

(4) O faamatalaga ua faasinomia i le faafuaiupu (3) e tatau ona saunia ma e tatau ona aofia ai:

- (a) se faamatalaga o feuiaiga faapisinisi tau tupe a le Pulega mo le tausaga faaletupe;
- (b) se faamatalaga o le tulaga tau tupe o le Pulega i le faaiuga o le tausaga faaletupe; ma
- (c) faamatalaga talafeagai ma atoatoa e uiga i faamatalaga tau tupe.

(5) O faamatalaga o tupe ua faasinomia i totonu o le faafuaiupu (3) e tatau ona:

- (a) tuuina atu ai se tulaga sagatonu o feuiaiga faapisinisi tau tupe a le Pulega a o faagasolo le tausaga faaletupe lea e faasino i ai; ma
- (b) tuuina atu ai se tulaga sagatonu o le tulaga tau tupe a le Pulega i le faaiuga o le tausaga faaletupe.

(6) E tatau i le Pulega, i totonu o le fa (4) masina i le tuanai ai o faaiuga o tausaga faaletupe taitasi uma, ona faia ina ia tuuina atu i le Pule ma Suetusi Sili mo le sueina faasuetusi o faamatalaga tau tupe ma isi faamatalaga e manaomia i lalo o lenei fuaiupu.

(7) E tatau i le Minisita ona ia faataatia i luga o le laulau a fono a le Palemene le lipoti faaletausaga a le Pulega faatasi ai ma le lipoti a le Pule ma Suetusi Sili i faamatalaga tau tupe a le Pulega i totonu o le 14 aso fono talu ona mauaina le lipoti faasuetusi a le Pule ma Suetusi Sili.

29. Tuusaunoaga mai Lafoga - O tupe maua a le Pulega e tatau ona tuusaunoa atoa mai lafoga.

VAEGA XI AIAIGA ESEESE

30. Ia maua e le Pulega faamatalaga-(1) I le noatia ma le fai fuafua i le faafuaiupu (2), e tatau i tagata uma taitoatasi po o faalapotopotoga e tuuina atu aoaoga faaauau, ona tuuina atu i le Pulega o faamatalaga e faasino i se tagata po o se faalapotopotoga e tuuina atu aoaoga faaauau pe afai e faapea ona faatonuina e le Pulega e ala i se faasilasilaga tusitusia.

(2) O malosiaga e faaee atu e le faafuaiupu (1) o lenei fuaiupu e faatoa mafai ona faatinoina pe afai e talafeagai le mauaina o le faamatalaga po o pepa aloaia mo faamoemoega o le faatinoga o galuega tauave a le Pulega.

(3) E ui lava i so o se mea i totonu o lenei Tulafono, o faalapotopotoga aloaia taitasi uma e tuuina atu Aoaoga Faaauau (PSET) ua faamauina i lalo o lenei Tulafono, e ao ona tuuina atu i le Pulega i se faiga faaletausaga ma ia lē silia le aso 28 o Fepuari o tausaga taitasi, o faamatalaga uma ua faatonuina e tulafono faatonutonu, a o faagasolo le tausaga ua tuana'i.

(4) So o se tagata o ia lea ua na mauaina so o se faamatalaga mo le Pulega i lalo o lenei aiaiga e tataua ona ia faia laasaga taitasi uma talafeagai ina ia mautinoa ai o lea faamatalaga o lo o tausaga i sea faiga e faamautinoa ai o mea o aofia ai i faamatalaga o lo o tausaga i se tulaga agatapuia ma faatoa faaogāina lava mo faamoemoega o le faatinoga o galuega tauave a le Pulega.

(5) So o se tagata po o se faalapotopotoga e tuuina atu aoaoga faaauau, o ia lea ua lē usitaia aiaiga o lenei fuaiupu, ua faia se soligatulafono ma e tataua ona noatia i se sala tupe e lē silia le 100 iunite tau faasalaga ma le 10 iunite tau faasalaga, mo aso taitasi e faaauuina ai pea le soligatulafono.

31. Malosiaga e faamaonia ai pepa faatumu - E mafai e le Pulega ona faamaonia, teuteu, pe suia le pepa faatumu mo so o se talosaga, tusi faamaonia, laisene, faasilasilaga, maliega po o so o se isi lava pepa aloaia o manaomia i lalo o lenei Tulafono.

32. Suesuega - E i ai le malosiaga o le Pulega e tauaveina ai galuega tau suesuega ua ia manatu e talafeagai mo le faatinoga o ana galuega tauave.

33. Faamatalaga molimau - O se tusi faamaonia ua sainia e le Ofisa Sili o Pulega ua faamoemoe e faamauina ai se fuafuaga, iugafono po o se faaiuga a le Pulega, o le faamatalaga molimau lea i le faia o lena fuafuaga, iugafono po o se faaiuga e le Pulega.

34. Talosaga a faalapotopotoga e tuuina atu aoaoga faaauau mo vaegatupe a le Malo-(1) O faalapotopotoga taitasi uma e tuuina atu aoaoga faaauau e talosaga mo vaegatupe a le Malo mo se polokalame po o aoaoga e faasino i Aoaoga Faaauau (PSET) e tatau ona feutagai ma le Pulega.

(2) Afai e manatu le Pulega e talafeagai ona faapea ona fai i tulaga aliae mai, e mafai e le Pulega ona faia o se maliega ma le faalapotopotoga e tuuina atu aoaoga faaauau pe ua aloaia pe leai foi, a o le i tuuina atu lana faamaoniga mo so o se talosaga mo Vaegatupe a le Malo i lalo o lenei fuaiupu.

(3) E lē tatau ona tuuina atu ni vaegatupe a le Malo i so o se faalapotopotoga e tuuina atu aoaoga faaauau o lo o saili tupe, seia vagana ua faamaonia le talosaga mo le faatupeina, i se faiga tusitusia e le Pulega.

35. Talosaga e faasaga i faaiuga-(1) I le noatia ma le fai fuafua i le faafuaiupu (7), o se faalapotopotoga e tuuina atu aoaoga faaauau ua ia faia ina ia talitonuina e faapea e le i maua e le faalapotopotoga e tuuina atu aoaoga faaauau se faaiuga amiotonu e faasino i le faamauina, le faamaoniga aloaia po o le suesueina o le faalapotopotoga e tuuina atu aoaoga faaauau e le Pulega, e mafai ona talosaga i le Minisita i se faiga tusitusia mo se toe iloilo o lenei faaiuga i totonu o le 14 aso talu ona maua o lenei faaiuga ma ia tuuina atu se ata o lea talosaga i le Loia Sili.

(2) Afai ua faia se talosaga i lalo o le faafuaiupu (1), e tatau i le Minisita ona tofia se komiti o talosaga e faasaga i faaiuga:

- (a) lea e tatau ona aofia ai ni sui se toatolu (3) o le komiti;
- (b) o i latou e le o ni tagata o le afaigaluega po o ni sui auai o le komiti faatino o le Pulega; ma
- (c) e i ai le tomai ma le potu masani e faasino i faamaoniga o tulaga aupito manaomia o Aoaoga Faaauau (PSET),

e iloilo ai le talosaga.

(3) E tatau i le Minisita ona tofia se taitaifono mai le komiti o sui e toatolu (3) na tofia i lalo o le faafuaiupu (2).

(4) O le komiti o talosaga e faasaga i faaiuga ua tofia i lalo o le faafuaiupu (2) e tatau ona i ai malosiaga uma o se Komisi Suesue e tusa ai o le Tulafono o Komisi Suesue 1964, ina ia mafai ai ona tauaveina le toe iloiloga.

(5) E mafai e le Loia Sili ona tofia se Loia faufautua e fesoasoani i le komiti o talosaga e faasaga i faaiuga ma o lea Loia faufautua e tatau ona faasinomia e faapea o le “Loia Faufautua e fesoasoani i le Komiti o Talosaga e faasaga i faaiuga”.

(6) E tatau i le komiti o talosaga e faasaga i faaiuga ona lipoti atu i le Minisita o ana fautuaga i totonu o se masina talu ona tofia aloaia, ma e tatau i le Minisita ona faia o se faaiuga e faavae i luga o lena fautuaga.

(7) Afai e lē faamalieina se tagata talosaga i se faaiuga a le Minisita, e mafai e le tagata talosaga ona talosaga i le Faamasinoga Sili e faasaga i le faaiuga, mo se toe iloiloga o lena faaiuga i totonu o le 21 aso talu ona maua o le faaiuga a le Minisita.

(8) E ui lava i so o se mea i totonu o lena fuaiupu, e lē tatau i le Minisita ona iloiloina se talosaga e faasaga i le faaiuga, seia vagana ua mauaina e le Minisita se faasilasilaga tusitusia mai le Komiti Faatino o le Pulega, e faapea o taumafaiga uma ina ia foia ai le mataupu e tusa ai ma tulafono faatonutonu ua faatonuina, ua lē faamanuiaina.

36. Puipuiga mai noataga-(1) E leai se tagi e tatau ona faia faasaga i le Malo, o le Minisita, o le Pulega, o le Ofisa Sili o Pulega po o so o se sui o le komiti faatino, tagata faigaluega, po o se sooupu a le Pulega po o so o se tagata o lo o galue e tusa ai o so o se pule faataga ua faaee atu e le Pulega, po o le Ofisa Sili o Pulega, po o le a lava le tulaga e mafai ai, e tusa ai o so o se gaioiga po o se mataupu ua faia po o ua lē faia i le agaga lelei i le faatinoga po o sa faamoemoe le faatinoga o a latou galuega tauave taitasi ua faaee atu e po o i lalo o lena Tulafono, po o so o se tulafono faatonutonu ua faia i lalo o lena tulafono.

(2) O totogi o loia mo le puipuiga mai so o se tagi e faia faasaga i le Minisita, le Ofisa Sili o Pulega po o so o se sui o le komiti faatino, tagata faigaluega po o se sooupu a le Pulega po o

so o se tagata o galue e tusa ai o so o se pule faataga ua faaee atu e le Pulega po o le Ofisa Sili o Pulega, po o le a lava le tulaga e mafai ai, e mafai ona tauaveina lea e le Pulega.

37. Tulafono Faatonutonu-(1) E mafai e Le Ao o le Malo, i le faia i luga o le fautuaga a le Kapeneta, mai lea taimi i lea taimi, ona faia ia tulafono faatonutonu e pei ona talafeagai ai po o ua alagata ai mo le faamoemoe o le tauaveina po o le faamamaluina atoatoa o aiaiga o lenei Tulafono.

(2) E aunoa ma le faatapulaaina o le tulaga lautele o le faafuaiupu (1), e mafai ona faia tulafono faatonutonu mo faamoemoega o le:

- (a) faatonuina o le taiala faataatia, taimi faatulagaina mo le faamauina, faamauina faaletausaga ma faiga o manaomia mo le tuuina atu, teena po o le faalēaogāina o le faamauina o le faalapopotoga e tuuina atu Aoaoga Faaauau (PSET), i lalo o lenei Tulafono;
- (b) faatonuina o le faiga e tautia ai so o se tusi resitala ma le faatumauiina o le Faatulagaga o Faailoga ma Tusi Pasi Tualoa a Samoa ua faavaeina i lalo o lenei Tulafono;
- (c) faatonuina o le taiala faataatia ma le faiga manaomia mo le faamaonia aloaia o polokalame a Aoaoga Faaauau (PSET) o manaomia i lalo o lenei Tulafono ma o ia aiaiga ma faiga e pei ona mafai ona faaogā i le tuuina atu, taofia lē tumau po o le toe faui i tua o le faamaoniga aloaia, e le Pulega;
- (d) faatonuina o faiga e manaomia mo le faatumauiina o faamaumauga o tulaga ua ausia;
- (e) faatonuina o le taiala faataatia ma le faiga o toe iloilo e manaomia mo le faamauina o se faailoga ma tusi pasi taualoa;
- (f) faatonuina o le taiala faataatia, taimi faatulagaina ma le faiga manaomia mo le tuuina atu, taofia lē tumau ma/po o le toe faui i tua o le maliega e le Pulega o le faaogāina o fuaitau ma faailoilo o lo

- o puipuia, e aofia ai le faamau faailoga a le Pulega, tagavai ma isi lava faailoga e ono mafai ona puipuia i lalo o lenei Tulafono;
- (g) faatonuina o le faiga manaomia mo le tuuina atu o faatonuga ma faasilasilaga manaomia mo le mauaina mai o faamatalaga mai tagata po o faalapotopotoga e tuuina atu aoaoga faaauau, i lalo o aiaiga o lenei Tulafono;
 - (h) faatonuina le faiga manaomia mo le tuuina atu o se faasilasilaga o le tausisia i lalo o aiaiga o lenei Tulafono, o pepa faatumu ma taimi faatulagaina o manaomia ma faasalaga o le a tataua ona faaogā mo le lē mafai e se tagata po o se faalapotopotoga e tuuina atu aoaoga faaauau, ona usitaia se faasilasilaga o le tausisia;
 - (i) faatonuina o faiga mo le toe iloilo ma talosaga e faasaga i faaiuga a le Pulega;
 - (j) faatonuina o le faiga manaomia mo le faatinoina o le sueina o tulaga aupito manaomia;
 - (k) faatonuina o faasologa po o ituaiga o faamatalaga manaomia ina ia tuuina atu e faalapotopotoga e tuuina atu aoaoga faaauau i se tulaga faaletausaga;
 - (l) faatonuina o le faavasegaina o tulaga eseese ma ituaiga o faailoga ma tusi pasi taualoa i luga o le Faatulagaga o Faailoga ma Tusi Pasi Tauloa a Samoa; po o
 - (m) le faia o soligatulafono ma faasalaga mo le soliga o na soligatulafono e oo atu i se tapulaa maualuga o le 100 iunite tau faasalaga.

38. Soloia - Ua soloia nei le Tulafono o le Pulega o Faailoga ma Tusi Pasi Tauloa a Samoa 2006.

39. Aiaiga Faasoina ma Aiaiga tau Soloaiga-(1) O faasinomaga uma i le tulafono po o so o se pepa aloaia po o se gaoioiga o i ai le pule i le Pulega o Faailoga ma Tusi Pasi

Taualoa a Samoa e tatau ona faitauina e faapea o lo o faasino i le Pulega seia vagana ai ua manaomia e le mataupu i se isi faiga e ese ai.

(2) So o se faatagaga, faamauina, tofiga, faamaoniga, faalēaogāina, faamalolo lē tumau, tuutuuga, faaaliga manino, talosaga, pemitā, tulaga faasaina, tuusaunoaga, poloaiga, fautuaga, faatonuga po o se gaoioiga o i ai le pule i lalo po o e aafia ai le Tulafono o le Pulega o Faailoga ma Tusi Pasi Taualoa a Samoa 2006, i le a lava le tulaga o i ai nei po o o lo o faamamaluina i lalo o aiaiga tutusa o lenei Tulafono seia i ai se taimi o le a suia ai, teuteu pe faalēaogāna, i le a lava le tulaga e ono mafai ona manaomia ai, i lalo o aiaiga o lenei Tulafono ma, afai e i ai se fesili po o se manatu po o le a le aiaiga tutusa o lenei Tulafono, e mafai e le Minisita e ala i se faasilasilaga tusitusia mo faamoemoega uma, ona faaali manino se aiaiga o lenei Tulafono e avea o se aiaiga tutusa.

(3) E ui lava i aiaiga o lenei Tulafono, o talosaga uma ma isi mataupu e tulai mai i po o i lalo o aiaiga o le Tulafono o le Pulega o Faailoga ma Tusi Pasi Taualoa a Samoa 2006 ia e le i fuafuaina pe tagofia i se isi faiga e ese ai i lalo o ia aiaiga i le aso o le amata faamamaluina o lenei Tulafono, e tatau ona fuafuaina pe tagofia i se isi faiga e ese ai i lalo o aiaiga tutusa o lenei Tulafono faatasi ai ma teuteuga, fetuunaiga ma suiga e pei ona mafai ona fuafuaina e le Minisita i se faiga tusitusia mai lea taimi i lea taimi.

(4) O faalapotopotoga faufautua taitasi uma po o komiti o lo o i ai nei i le taimi o le amata faamamaluina o lenei Tulafono e fesootai i le Tulafono o le Pulega o Faailoga ma Tusi Pasi Taualoa a Samoa 2006, e tatau ona faatatauina e avea o se faalapotopotoga faufautua po o se komiti ua faavaeina e le Minisita i lalo o aiaiga tutusa o lenei Tulafono.

(5) E ui lava i aiaiga o lenei Tulafono, pe afai e le o aiaia e lenei Tulafono po o e lē lava pe lē talafeagai aiaiga ua tuuina atu mo le suiga mai le Tulafono o le Pulega o Faailoga ma Tusi Pasi Taualoa a Samoa 2006, e le Minisita, i se faasilasilaga ua

lomia faasalalau i le gagana Samoa ma le gagana Peretania i totonu o le Savali, e mafai ona faia ai aiaiga e pei ona manatu le Minisita ua talafeagai ai ina ia mafai ona sagatonu ma fuafuaina lelei mataupu uma i lalo o le Tulafono o le Pulega o Faailoga ma Tusi Pasi Taualoa a Samoa 2006 pe tagofia i se isi faiga e ese ai i lalo o aiaiga o lenei Tulafono.

**O le Tulafono o le Pulega o Faailoga ma
Tusi Pasi Taualoa a Samoa 2010 o lo o faafoeina
e le Pulega o Faailoga ma Tusi Pasi Taualoa a Samoa.**

**Lolomiina e le Failautusi o le Fono Aoa o Faitulafono,
i le pule a le Fono Aoa o Faitulafono.**